



Le Premier [-sixieme] babillard dv temps : en vers bvrlesqves.

<https://hdl.handle.net/1874/362755>

LE CINQVIESME
BABILLARD


D V

TEMPS
EN VERS
BVRLESQVES.



A PARIS,
Chez NICOLAS DE LA VIGNE,
près Saint Hilaire.

M. DC. XLIX.
A V I C P E R M I S S I O N .





LE CINQVIESME
BABILLARD

D V

TEMPS
EN VERS
BVRLESQVES.



COV RAGE, il nous faut cajoller,
 Et mieux que iamais babiller,
 Et icy chanter & dire,
 Que quasi hors de martyre
 Nous croyons estre assurement,
 Voyant vn si bon changement,
 Malgré le mal-heureux langage
 De ceux qui ont dict que les passages
 Estoient bouchez des ennemis,
 Ceux là ne nous estoient amis
 Qui venoient dire ces nouvelles,

Qui n'estoient ny bonnes ny belles:
 Mais sçavez-vous bien qui c'estoit
 Qui ces comptes nous raportoit,
 Ce sont de ces Monopoleurs,
 De ces Larrons, de ces Volleurs,
 Qui desireroient que la Ville,
 Hommes, garçons, femmes & fille
 Fussent peüs dedans vn feu.
 Voyla leur priere & leur vœu:
 Mais mal gré eux & leurs audace,
 Le bon Dieu nous fera la grace
 De vaincre ceux qui veulent mal
 A Paris, & le Cardinal
 Pour certain a beau faire & dire,
 Il faut qu'il meure en martyre,
 Ainsi le diët Nostradamus,
 Et le Grand Polyphemus
 Dans trois ou quatre Centuries,
 Et ie croy bien que les furies
 Son ame bourelent desia
 Bien plus que ne fait Margaja.
 Il faut reprendre mon discours,
 Cen'est pas pour parler d'amours,
 C'est pour vous faire icy entendre
 Que les Boulangers sans attendre
 Sont fournis de bleds & fromens
 Pour vous faire de bons pains blancs,
 Que l'on vendra à bon marché,
 De cecy aucun n'est fâché,
 Il y a beaucoup de mes amis
 Qui sont las de manger pain bis:
 Mais à present dorefnauant
 Il en pourront manger de blanc,
 L'on en voit dessus la Boutique,
 I'estime fort ceste praticanne,
 Foy de veritable François,

Je voudrois qu'à tout iamais
Il fust ainsi doresnauant,
Pour soulager les pauures gens,
A propos les petits enfans
Seresioüiront maintenant
Les Patıcıers font des gateaux,
Des grands, des petits & des beaux:
Comme ils auoient accoustumé,
Cela est bien a estimer:
Car il y a bien quinze iours
Que les gasteaux n'ont plus de cours,
Cecy sont des discours d'enfans,
Disons des propos plus eloquans,
Parlons du Prince de Conty,
Qui de valeur est assorty,
De beauté & de bonne grace
Autant que Prince sans falace.
Tous les iours il va aux trauaux
Auec les autres Generaux,
Où il met tous les gens en ordre,
Ne permettant aucun desordre,
Fait trauailler fort promptement,
Aux lignes & aux retranchements,
Pour empescher aux ennemis
De faire ce qu'ils ont promis,
A ce Diable de Cardinal
Qui est pire qu'un cheual,
Puis qu'il ne veut pas reconnoistre
Ceux qui ont causé qu'il est Maistre,
Dont pour luy auoir fait honneur
Ils en sont presque à malheur:
Mais parauant quinze Dimanches
Ils en pourront tirer reuanche:
Car nostre armée est bien complete
D'infanterie belle & leste,
Mefme sans faire brauerie,

Nous auons belle caualerie,
 Lesquels sont tous bien montez,
 Enharnachez & esquipez,
 D'où la Ville en est bien contente:
 Mais nos ennemis l'espouuante
 Ont prise, sçauuez-vous comment,
 On leur a mandé vrayement
 Que ce Grand Archiduc Guillaume,
 Autrement Leopold se nomme,
 Vient avec quantité de gens,
 Vualons, Crauates & Allemans,
 Qui ont iuré, chose asseurée
 De bien-tost reduire en fumée
 Le Cardinal, si desormais
 Bien-tost ne veut faire la Paix,
 Et desia leur armée auance,
 Puis qu'ils sont entrez dans la France,
 Sans faire aucune hostilité,
 Dont chacun est bien contenté,
 Mesme il a mandé vne lettre
 A Madmoiselle, sans obmettre,
 La suppliant qu'à ceste fois,
 Elle se porta pour la Paix,
 Et qu'elle fit tout son pouuoir,
 Mettre la Reyne à son deuoir,
 L'on dit qu'elle y est bien portée,
 Et le bruit & la renommée
 Court que la Reine vrayement
 Demande accommodement.
 D'autre ont dict que de Condé
 Desire ce iour sans tarder,
 Que l'on veille liurer bataille.
 Si cela se fait, toute sa canaille
 Pourra bien quitter l'ornement,
 Les bagues & demy seings d'argent.
 Qu'ils ont pris à ces pauures femmes,

N'est-ce pas pour eux vn grand blasme,
 De passer plustost pour voleurs
 Que non pas pour des gens de cœur.
 Car ils ont pillié les Eglises
 Et mis les hommes en chemise.
 Sans auoir aucune pitié,
 Estant pires plus de moitié,
 Que ne seroit pas le Tartare,
 Le Turc, Sarazin & barbare,
 Mais voicy leur chassiment
 Qui approche certainement
 Car pour vray le Duc de Longueuille
 A vne armée bien gentille
 Qui est logée à ce iour
 A Roüen dedans le fauxbourg,
 Et ils s'en vont prendre leur marche
 A tirer iusque au Pont de l'Arche
 Pour s'assembler ce me dit on
 Aucc monsieur de matignon.
 Cependant au pays du Maine,
 On si arme chose certaine,
 Et les petits & les grands
 Les gens de mestier & Marchands
 Y veulent tous chose assurée
 Ce iour composer vne armée:
 Bref desia plus de huit mille
 D'humeur tres-gaillarde & gentille
 Ont promis que le Mazarin
 Poura, bien passer par leur main,
 S'il y passe qu'il prenne garde
 A ce bien fournir de Moutarde,
 Car ils ont tres-bien de la chair,
 Que l'on n'achette pas trop cher
 Ça, ça, quitons la Normandie,
 Tant à present que ie vous die
 Qu'à ce coup deuers Bordeaux

On arme hommes & Cheuaux
 Pour & au nom de la Commune
 Promptement tanter la fortune,
 Et ont iuré par leur serment
 Qu'ils seroient pour le Parlement,
 Comment disent-t'ils de courage
 Souffrirons nous qu'on face outrage
 Au plus illustre Parlement
 Qui soit deffous le firmament,
 Nenny nenny ie vous assure
 Qu'aucun de nous ne se pariure,
 Nous sommes tous prests de mourir,
 Et le parlement secourir.
 Voila comme chacun se porte
 A nous defendre de la sorte
 Nous en deuons tous en ce lieu
 Bien humblement remercier Dieu.

F I N.